



Hemelvaart roep gelowiges op om die hemel reeds nou sigbaar te maak

Om *Blitspos* te ontvang, stuur 'n e-pos na bladuitleg@nhk.co.za of grafies@nhk.co.za en versoek dat u naam op die versendingslys geplaas word

Nuus, berigte en kort kommentaar (uiters 100 woorde) aan taal@nhk.co.za

Die plasing van teksadvertensies is gratis vir gemeentes. Advertensies met grafika beloop R350 per uitgawe. Klik asseblief *hier* vir meer inligting en voorwaardes.

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Hemelvaart is meer as net 'n kerklike feesdag op die kalender. Dit is 'n dringende herinnering dat gelowiges reeds hier en nou as sigbare getuies van God se koninkryk behoort te leef.

In Lukas 24: 48-51 word vertel hoe Jesus sy dissipels seën en voor hulle oë in die hemel opgeneem is. Net voor sy hemelvaart laat Hy hulle met 'n duidelike opdrag agter: hulle moet sy getuies wees en wag totdat hulle met krag van bo toegerus word. Hiermee verskuif die fokus van Jesus se vertrek na die taak van sy volgelinge op aarde.

Hemelvaart sluit nou aan by die bede in die Onse Vader: *Laat u wil geskied, soos in die hemel net so ook op die aarde* (Matt 6: 10, AFR1953). Hierdie woorde is nie bloot deel van 'n gebed nie, maar 'n oproep tot 'n lewe waarin God se wil die hoogste gesag geniet.

Waar God se wil in die hemel volmaak geskied, word dit op aarde daagliks uitgedaag deur menslike begeertes, die druk van die samelewing en wêreldse waardes. Juis daarom word God se koninkryk sigbaar wanneer mense kies vir geregtigheid, liefde en vergifnis eerder as selfbelang, verdeeldheid en wraak.

Die Bybel leer dat die mens as beeldraer van God geskape is. Hierdie waarheid bring nie net identiteit nie, maar ook verantwoordelikheid. God se beeld moet sigbaar word in die manier waarop gelowiges leef, praat en ander behandel. Sy koninkryk breek dikwels stil deur – in dade van liefde, waarheid en selfopoffering.

Hemelvaart bring ook die troos dat gelowiges nie aan hulself oorgelaat word nie. Jesus belowe die Heilige Gees as Trooster. Deur die Gees ontvang gelowiges ook krag, wysheid en hoop om God se wil uit te leef, selfs in tye van onsekerheid en moedeloosheid.

Die dag vra daarom van elke mens eerlike selfondersoek: *Watter koninkryk bepaal my lewe?* Die wêreld meet sukses dikwels aan mag, aansien en prestasie, maar God se koninkryk werk anders – die nederige word verhoog, die minste word groot, en dié wat hulself in diens van ander stel, vind ware vervulling.

Hemelvaart is dus nie slegs 'n herinnering aan wat eenmaal gebeur het nie. Dit is 'n lewende vertrekpunt vir elke dag. Christus regeer, en sy volgelinge word reeds nou geroep om as burgers van die hemel te leef.

Wanneer gelowiges die wêreld met liefde, geregtigheid en hoop betree, word die hemel reeds hier en nou sigbaar in 'n gebroke samelewing.

**Ds Mariët Robbertze
(Kempton)**

Lief en leed

- Ons dink aan al die lidmate wat in **stormgeteisterde gebiede** is. Ons bid vir jul veiligheid en vir die vinnige herstel van die infrastruktuur.
- **Die Moderamen** het tydens hul onlangse vergadering van die volgende lief en leed kennis geneem:
 - **Mnr Elton en ds Retha Losper** (Suidoos-Witbank) se **baba, Robert**, is uit die hospitaal ontslaan. Ons dink aan die Losper-gesin en bid vir Robert se spoedige herstel.
 - **Mej Sanet du Plessis**, taalversorger en produksiebestuurder, se chemoterapie is afgehandel.
 - **Ds Lillian Erasmus** (Wonderboom) is op 2 Mei met **mnr Nickie Opperman** in die **huwelik bevestig**. Sy sal voortaan as **ds Erasmus-Opperman** bekend staan. Ons wens die paartjie van harte geluk en wens hulle gelukkige toekoms toe.
 - **Mnr Johan** (Bedryfshoof) **en mev Clarika** (HTK) **Hattingh se seun, JD**, het op 9 Mei 2026 vir die **Junior Springbokke** uitgedraf.
 - **Ds Colin** (Middelburg-Noord) **en mev Annelie Hertzog** het 'n **kleinseun** ryker geword. Mag hierdie kleinkind vir julle baie vreugde verskaf.
 - **Ds Frikkie** (Montana-Oos) **en mev Sanet van Wyk** het 'n **kleindogter** ryker geword. Mag hierdie kleinkind vir julle baie vreugde verskaf.
- **Die volgende predikante verjaar tot 22 Mei. Die Kerk wens u 'n geseënde lewensjaar toe.**
 - Donderdag 14 Mei: Di WJJ (Willem) Kok (emeritus/Potchefstroom), en PJ (Pieter) Uys (emeritus)
 - Saterdag 16 Mei: Di EM (Liza) Jansen (Witbank-Suid), en AC (André) Swanepoel (Derde Kruis)
 - Maandag 18 Mei: Ds MS (Marissa) Kidson (Pretoria-Wes)
 - Woensdag 20 Mei: Dr PJ (Piet) van Zyl (emeritus), en ds HJ (Hendrik) Odendaal (emeritus)



Ds Lillian Erasmus-Opperman en mnr Nickie Opperman

Gemeentes en bediening

- **Samesmelting van Gemeentes Witfontein en Pretoria-Noorderlig:** Die proses rondom die samesmelting van Gemeentes Witfontein en Pretoria-Noorderlig is afgehandel. Die samesmelting het op Sondag 22 Februarie 2026 plaasgevind. Die ringskommissie is tevrede dat die proses kerkordelik korrek verloop het. Die twee gemeentes sal voortaan as **Gemeente Witfontein** bekendstaan.
- **Dr GC (Gerhard) Lindeque** (emeritus/BSA) het 'n beroep na Makarios (deelyds) ontvang. Hy het die beroep aangeneem en word op Sondag 24 Mei bevestig.
- Enige saak wat volgens die Kerkorde onder die aandag van die **Kommissie van die Algemene Kerkvergadering** gebring moet word, moet mev Karen Breedt (karen@nhk.co.za) asseblief **teen 25 Mei** bereik vir die vergadering van **4 en 5 Junie**. **Geen laat sake** sal in die agenda opgeneem word nie.
- Die **25-jaar ampsjubileum** van **ds Andre Oberholzer** (Witbank-Noord) vind op 30 Augustus by Gemeente Witbank-Noord om 09:00 plaas. RSVP asseblief teen 25 Augustus by [sandra.nhk@web4us.co.za](mailto:nhk@web4us.co.za) indien u die geleentheid wil bywoon.



Dr Gerhard Lindeque

Werkgeleenthede

- **Werkgeleentheid vir junior ouditklerk**
Die Nederduitsch Hervormde Kerk is op soek na die dienste van 'n junior ouditklerk by die Ouditafdeling in Pretoria.

Vereistes van die pos:

- Matriek
- Basiese rekeningkundige kennis en/of ervaring

- Kennis van SAGE One en/of Pastel sal 'n groot aanbeveling wees.
- Moet rekenaarvaardig wees in ten minste Microsoft Office
- Moet ten volle tweetalig wees
- Moet oor 'n geldige rybewys beskik

Verder moet die kandidaat:

- Plijsgetrou wees
- Oor die vermoë beskik om as lid van 'n span te kan funksioneer
- Oor goeie kommunikasie- en organisasievaardighede beskik

Onderhandelbare salaris met normale diensvoorwaardes.

Sluitingsdatum: 31 Mei 2026

Aansoeke moet gerig word aan: Mev AW Short, annelie@nhk.co.za, 012 322 8885

• **Werkruimte vir deelsorgbediening: Gemeente Wonderboompoort**

Gemeente Wonderboompoort is geleë in Eloffsdal, Pretoria, en beskik oor 'n vakante deelsorgbedieningsposisie wat nie aan 'n spesifieke ouderdomsprofiel gekoppel is nie. Aansoeke word ingewag van gelegitimeerde predikante en proponente van die Nederduitsch Hervormde Kerk van Afrika (NHKA).

Die gemeente het 148 belydende lidmate en 12 dooplidmate. Die meerderheid van die lidmate is tussen die ouderdomme van 59 tot 94 jaar.

Vereiste:

Ons is op soek na 'n dinamiese en roepinggedrewe persoon wat met passie in 'n gemeente wil dien. Die gemeente is toegewyd aan die erediens en die verkondiging van die woord van God. Die posisie is ideaal vir iemand wat 'n lewende verhouding met Jesus Christus en 'n liefde vir mense het. Bybelse waarhede en gemeenskapsbetrokkenheid in ooreenstemming met ons geloofsbeginsels is 'n vereiste.

Verantwoordelikhede sluit in bedieningswerk soos uiteengesit in die Kerkorde van die NHKA (preekbeurte en eredienste), pastorale sorg en besoeke soos benodig, deelname aan gemeenteaktiwiteite en strategiese beplanning. Eie vervoer is belangrik.

Kerkgebou en pastorie:

Gemeente Wonderboompoort beskik oor 'n kerkgebou en saal en is geleë te Mansfieldlaan 624, Eloffsdal, Pretoria. Daar is nie 'n pastorie beskikbaar nie. Die SP Engelbrecht-museum is op dieselfde perseel geleë.

Vergoeding:

Die gemeente kan die predikant vergoed met 'n totale pakket van R480 000.00 per jaar (onderhandelbaar) plus 'n jaarlikse vakansietoelae van R40 000.00. Behuising- en voertuigtoelae asook 'n datapakket is ingesluit.

Leraarsprofiel:

Die Hervormde identiteit en etos is vir die gemeente belangrik. Die Etiese Kode van die Kerk moet streng nagevolg word. Teologiese opleiding en ondervinding in gemeentebediening geniet voorkeur.

Aansoeke:

Sou u belangstel, stuur u CV (met VBO-krediete), 'n kort geloofsgetuienis en verwysings na die SGB-verteenwoordiger en -fasiliteerder, dr Hannes Janse van Rensburg (hannessgb@nhk.co.za). **Aansoeke sluit 1 Junie.** Diensaanvaarding sal wedersyds onderhandel word.

Die kerkraad behou die reg voor om 'n kortlys saam te stel vanuit die aansoeke wat ontvang is en is nie verplig om een van die aansoekers te beroep nie en het ook die keuse om 'n predikant van sy keuse te beroep. Aansoekers sal verwittig word wanneer die beroep uitgebring word.

Vergaderings

- Vrydag 15 Mei
- Woensdag 20 Mei
- Donderdag 21 Mei

Raad van Finansies
Bestuurskomitee
NHKA Pensioenfonds
SSF NHKA Bestuursforumvergadering

'n Gedig

Voordat Hy weg is

Voordat Hy weg is,
Hy wat dood in die graf gelê is,
Hy wat in 'n Godswonder weer tussen ons gestaan het,
Hy wat met mondhoeke wat net wou glimlag,
vir Thomas genooi het:
“Kom voel waar die spies en spykers in is ...”
Voordat Hy weg is,
het hy oor ons geblaas,
gesê ons moet die Gees ontvang.

Op 'n dag verdwyn Hy in 'n wolk.

Om dáárvan sin te maak, het tyd gevat.
Maar ons het onthou:
Daar was die trek deur die woestyn,
God-in-'n-wolk
wat bý ons moeders en vaders was.
Ons het onthou hoe Hy oor ons geblaas het.
Sy gees was dáár.
Ons het gewet: al is Hy weg, is Hy bý ons,
is Hy nader aan ons as ons asem.
Ons het nie weer alleen gevoel nie.

Neels Jackson

<https://web.facebook.com/neels.jackson>

Kerklieke en ander publikasies

DIE KONINKRYK VAN GOD

Wyle dr Daan van Wyk (sr) se boek is in die boekwinkel beskikbaar. Hierdie boek gee perspektiewe op die eindtyd wanneer die koninkryk van God in volmaaktheid sal aanbreek. Aan God die eer!

Bestel by boekwinkel@nhk.co.za





R300

DIE UITGEBREIDE LITURGIESE KALENDER

’n Kategismus, asook historiese en teologiese toeligting

’n Boek wat elke predikant en belangstellende lidmaat moet hê om elke Sondag op ’n verantwoordelike wyse met die kerklike jaar, en so met die evangelie om te gaan!

Geskryf deur prof **Natie van Wyk**

Bestel van mev Sarie Roux by boekwinkel@nhk.co.za

Kom kyk saam


- Kom kyk saam na ons weeklikse Blitsflits. Hierdie episode is aangebied deur **Lane Truscott**. Klik [hier](#) vir verlede week se weergawe. Geniet u die Blitsflits? Laat gerus vir ons kommentaar. Nuwe weergawes verskyn elke Vrydag en is beskikbaar op sosiale media en YouTube.

Fondsinsamelings en Kerksake

- Die Kerkraad van **Gemeente Benoryn** (Benoni) nooi hiermee alle voormalige predikante, lidmate en belangstellendes hartlik uit om die gemeente se **85ste bestaansjaar** saam te vier. Die viering vind op **24 Mei 2026** plaas met ’n erediens om **09:00**. Na afloop van die erediens sal daar as gemeente saam geëet word. U word vriendelik uitgenooi om ook aan hierdie geleentheid deel te neem. **Vir verdere navrae of om u bywoning te bevestig**, kontak asseblief vir **Corné by 083 391 1368**.
- Kom neem deel aan **Gemeente Meyerton-Suid** se **potjiekoskompetisie** op **30 Mei vanaf 10:00 tot 16:00** op die kerkterrein. Inskrywings beloop R100 per span van vier persone. Die potjie sal aan hierdie fondsinsamelingprojek geskenk word. As jy nie aan die kompetisie deelneem nie, is **etekaartjies beskikbaar teen R50 per potjie**. Jy kan gerus ook solank jou span inskryf vir die **boeresport**. Inskrywingsfooie is R100 per span. **Kontak gerus vir ds Chantelle Maree by 064 755 0172**.
- **Gemeente Welkom se Wildsfees 2026** vind op **5 Junie** vanaf 17:00 tot 20:00 plaas. Kom smul saam aan heerlike voorgeregte soos wildspastei of wildsvleissosaties, hoofgeregte van wilds- of skaapvleis met sjokolade-brandrissiesous, kersiesous of rooiwynsous en bykosse. Natuurlik is daar nagereg op die spyskaart in die vorm van Jan Ellispoeding met vla. **Goeie kos, goeie wyn, goeie vriende – dis ’n fees!** Koste beloop R200 per persoon en R80 vir kinders onder 12. **Kontak ds Anel Boshoff by antjieels8@gmail.com** vir besprekings.
- Kom speel gholf saam met **Gemeente Welkom**. Hul **gholfdag** vind op **11 Julie** by Brand Mashie Gholfklub plaas. Afslaan is 08:00 vir 08:30 of 12:00 vir 12:30. Koste beloop R250 per persoon. **Kontakpersone:** Tristan (063 903 1152), Donna (082 339 0939), ds Anel (082 299 2044) of Karin (072 555 5667).
- **Ons hoor graag van geleenthede by gemeentes**. Stuur asseblief die besonderhede van die fondsinsamelingfunksie, basaar of viering na: taal@nhk.co.za.

SP Engelbrecht-museum

- Lidmate word vriendelik **uitgenooi om ons kerkmuseum, die SP Engelbrecht-museum te kom besoek**. Die museum is geleë op die gronde van Gemeente Wonderboompoort te Mansfieldlaan 624, Eloffsdal, Pretoria. Kontak asseblief vir ds Johann de Bruin (careljohann@gmail.com of 082 733 3951) om u besoek te bespreek.



SP Engelbrecht Museum

Kerk- en kultuurmuseum



TERUG IN TYD



VEILIGE PARKERING
OPRIT VIR ROLSTOELE
PIEKNIKPLEK LANGS OSSEWA



Like us on Facebook [SP Engelbrecht Museum](#)

Ds. Johann de Bruin
082 733 3951

Toerusting

- **Pastorale beradingskursus: Die digitale impak op kinders en jongmense. Praktiese en pastorale riglyne.** Hierdie kursus vind op Woensdag 10 Junie van 09:00 tot 13:00 via 'n Zoom-aanbieding plaas. Die aanbieder is **prof Wentzel Coetzer**.

Akkreditering: VBO-, CPSC- en AFM PCD-punte

Koste: R300 pp (R45 ekstra vir inskrywings uit Namibië en die buiteland as gevolg van bykomende bankheffings)

Handboek te koop (opsioneel): R370 (R250 plus R120 vir koerier)

Navrae: 083 660 0409 (ook WhatsApp) of e-pos: wentzelc@gmail.com

Volg die kursus op 'n latere datum: Persone wat nie die betrokke oggend die kursus kan bywoon nie, kan nogtans registreer en dan agterna 'n skakel ontvang om op enige later datum weer die kursus te kan volg.

Klik [hier](#) om vir **die kursus te bespreek**.

Barmhartigheid

- Klik asseblief [hier](#) vir meer inligting oor **seniorbehuising en -versorging**.

Gebed vir die week

Here God,

U woon daar bo en ons hier onder.

Dit is nogal 'n verskil.

Hier onder lyk dit dikwels asof U nie hier is nie.

Maar die dag van u hemelvaart herinner ons daaraan dat daar 'n verbinding tussen die hemel en die aarde is.

Daardie verbinding is deur Jesus Christus tot stand gebring.

Hy het afgekom na die aarde en het weer opgevaar na bo.

Hy is nou by U en danksy Hom kan ons na U toe kom.

Gee, God, dat dit ons harte warm en gelukkig maak

en seën ons kollegas en al die mense wat aan ons sorg toevertrou is, sodat ons kan ervaar dat Jesus by ons is.

Help ons om die band tussen hemel en aarde te voel

en dit ook vir ander tasbaar te maak,

en hoor ons gebed om Jesus se ontwil.

Amen.

Uit *'Met sonder Jesus' over Hemelvaart* (2014)

(Vertaal deur Sanet du Plessis)